

Xujun xi kits'ínkjihí nda postru Pablo xuta ninku Colosa

B'i ts'ín kikjaniñaha Pablo xuta ninku xi tjín nanki Colosa

¹ An Pablo, an xi kama nku nda postruhu Jesucristo at'aha Ntíaná b'a ts'ín kama mjehe. An ko nda nts'eé Timoteo ² tísuniñaihi já nts'eé xi tintsuboo nanki Colosa, jun xi kikj'áts'enuu Ntíaná ko s'ejinnuu Cristo.

Kas'enuu kjuanda ko kjuajyu xi tsjáná Ntia Na'miná.

B'i ts'ín kinchjantjai Pablo xuta ninku xi tjín nanki Colosa

³ Xki nga chubantjaihi nginkun Ntíaná xi Na'mihí Nda Ntíaná Jesucristo, 'bahihi máb'achjíhi ⁴ at'aha kik'inyaní xi nkú ts'ín s'ejinnuu Jesucristo ko xi nkú ts'ín tjonuu ngayjee xuta xi ts'e Ntíaná. ⁵ B'a t'n'o at'aha kinu'yó én nda tsuhu Jesucristo, én xi naxu tjín. Y'éjña chjinuu ni xi tjínda ngandanuu ndjiojmi ján. Kui niu xi ja tichuyóhoo nd'ai.

⁶ Kui éin xi tsichujinnuu nda títs'ín ko tífindju ajihín xuta nga ngúsuhun asuntee. B'a ta tíma ajinnuu b'aha ra nistjín nga kinu'yó ko tsichu mankjinnuu xi nkú tjihín ra kjuandaha Ntíaná. ⁷ Kui éin xi tsakúyanuu nda Epafra, nda musu xinkí xi 'yún tjoní. Naxu tífiko xáha ei nga títs'ínxát'aha Cristo ngajonuu. ⁸ Kui xi kitsúyaní kjuatjo xi y'éjñajin animanuu Espirituhu Ntíaná.

⁹ Nkúhu nga kik'in^{nyani} kui niu, najmi t^{ín}'ekj'áiyai nga t^{íchubantjáihi} nk'ie nga t^{íchubakoi} Nt^{ianá}. T^{íbinchihi} nga katumankjinyjenuu ni xi mjehe, ko nk'ie nga Espirituhu katsj^{ánuu} nga nanka n'enkj^{íntak'un} ko nga kamankjinnuu ni xi ts'e Nt^{ianá}. ¹⁰ B'a katuma tu xi ku^{intsubahanu} xi nkú ts'^{ín} t^{jehen} ra xuta xi ts'e Nda Nt^{ianá} ko nga n'oo ni xi sas^{ihin}. T^{íbinchihi} nga n'oo ngayje t^{íkjá} ni xi nda ko nga 'yún kamankjinnuu nkú t^{jihin} ra ngat'a ts'e Nt^{ianá}. ¹¹ 'Yún kasakú nga'y^{únnuu} xi nkú ts'^{ín} t^{jehen} ra nga'y^{uhun} Nt^{ianá} xi t^{jihin} kjuachánka, tu xi ku^{ichúkuahanuu} tu mí nihí ni ko tu xi najmi n'ekjehe ruu tak'un.

¹² Tsjo kat'enuu ko t^{johon} máb'achj^{íhi} Nt^{ia} Na'miná xi kits'^{ín} nga kama sak^{únuu} ni xi ts'^{íinkjáihi} xuta xi ts'e xi k'úentu má ndzjeen. ¹³ At'aha ja kikjex^{ínná} aj^{ihin} nga'yún xi t^{jín} má jyuun ko kits'^{ínk'aná} má batéxuma Nt^í xi t^{joho}. ¹⁴ Kui xi y'échj^{íntjainá}, kui nga kin'endyjat'ahaná ngatitsunná nd'aí.

B'i ts'ín tsakúya Pablo ni xi kits'ín Cristo ngan-daná

¹⁵ Cristo kui xi nk'ie nga yaá, Nt^{ianá} yaá. Ntukaán bi najmi ma ch^{jihí} Nt^{ianá}. Kui xi Nt^{íhi} Nt^{ianá} xi t^{jun} kintehe ni nga n'enda ngayjee ni xi kin'enda. ¹⁶ At'aha kui t^{jíña}, kui nga kin'endaha ni xi t^{jín} ndj^{iojmi} ján ko asunntee, ni xi ma ch^{ji} ko ni xi najmi ma ch^{ji}, xi k'aku ko xi t^{jihin} xá, xi batéxuma ko xi nk'a t^{jen}. Kui kin'echj^{én} nga kamanda ni xi t^{jín} ko kui kama ts'e. ¹⁷ Kui xi tu b'a ts'^{ín} jahá t^{jíña} kintehe ni nga kamanda ngayjee ni

xi tjin, ko kui ngat'aha b'a k'uhun ni xi tjin xi nkú k'un.

¹⁸ Xi nkú ta ts'in nintakaá batéxumaha yjonintená, b'a ta ts'in Cristo batéxumaha xuta ninku. Kui xi tjuhun. Kui xi tjun j'áiyaha ajihin xuta k'ien tu xi nk'a tsjéhen ra ngayjee ni xi tjin. ¹⁹ At'aha kama tsjoho Ntjaná nga y'éñajihin Jesucristo xi nkú ts'in tjiyaha. ²⁰ Ntjaná kits'in nga kjuaik'un ngaha ra ngayjee xi incha ngji t'axin. Cristo kits'in chjen, kui nga tu ngat'aha jni xi tsaténdzjoho Cristo t'a kruu kitsjaha ra kjuajyu ngayjee xi tjin t'anankiu ko xi tjin nk'a jan.

²¹ Nistjin nk'ie tsinima t'axihun Ntjaná ataha ni ch'onk'un kin'o ko animanuu ngji kontraha Ntjaná. ²² Tunga nga nd'ai Ntjaná ja kits'in nga kjuaik'un ngaha ruu tu ngat'aha nga Cristo kits'in kjas'en yjonintehe nga kin'ek'ien. B'a kits'in Ntjaná tu xi kama kuichunchahanu nginkun ko kamo xuta xi ts'e xi najmi tjihin chunti ko xi najmi kama n'enijehé ra tsa mí nihi.

²³ B'a kama tsa tu nku kixihí ko ndjá kuinchajiun xi nkú ts'in s'ejinnuu Ntjaná ko tu nku chuyahá ruu ni xi y'éña chjinuu én nda tsuhu Jesucristo xi ja kinu'yó. Kui éen xi tis'enijmíhi xuta xi tjin nga ngúshun asuntee. An Pablo kik'ai xána nga k'uenijmía éin.

B'i ts'in kitsúya Pablo xá xi kik'aihi

²⁴ Nd'ai tsjo tjinna nga tísakúna kjua'un ngandanuu. Ajihin yjonintena tífindju kju'a'un xi tísakúhu Cristo ngandaha xuta ninku, at'aha xuta ninku xi yjonintehe Cristo. ²⁵ Títs'in xá ajihin xuta ninku xi nkú ts'in y'éña Ntjaná nga kitsjana xá

xu'bi ngandanuu, tu xi b'a ts'in s'enijmíhi xi nkú tjiin ra éhen Ntíaná.

²⁶ Tíb'enijmíá ni xi kis'ejña 'ma nú chá ján. Najmi kisakúchjhi niu xuta xi kis'e nistjin nk'ie. Tunga nd'ai xuta xi Ntíaná kikj'áts'e tís'ejña chjhi niu.

²⁷ Kits'in mje nga kuakúhu xuta xi ts'e xi nkú ts'in tíjña kjuanchináha kō kjuachánkaha ajihin xuta xi tjin nga ngúshun asuntee. Kui nihi xi ja tís'ejña chji nd'ai. Kō ni xi tís'ejña chjiu, kui xi Cristo. Kui xi tíjñajinnuu kō tít's'in nga tichuyohoo nga sakúhunuu kjuachánka.

²⁸ Kui Cristo xu'bi tíb'enijmíhi xuta. Ya sisiin xi nkú ts'in tí'bai niyáihí kō títakuyáihí ngayjee xuta, tu xi kuichú maha ngayjee xuta xi s'ejihin Cristo xi nkú ts'in mjehe Ntíaná. ²⁹ Kui ni xi tít's'ian nk'ie nga tít's'inxá. Nga'yún xi tít's'ána Cristo títasinkona, kui nga ndjá tít's'inxána.

2

¹ Mjena nga choo nga tu xí tsehé kjuanima tibenkinuu jun kō xuta ninku nanki Laodicea kō ngayjee xuta xi najmi be xi nkú tjián. ² Mjena nga sakú nga'yúhun ngayjee xuta ninku, nga nkuhú k'ua xinkjín at'aha tjoho, kō nga nkuhú b'a kuitsu kjuankjintak'uhun nga nkúnkú, kō nga kamankjinyehe ni xi mjehe Ntíaná. Yohó ni ma kamankjihin ni xi y'éjña 'ma Ntíaná, kui nihi xi Cristo nd'ai. ³ Kui nga nk'ie nga yahaná Cristo yaá ngayjee kjuankjink'un xi 'yún nanka xi chjhi ra.

⁴ B'i ts'in tít'et'ánuu tu xi najmi ch'a én tsjo tsu tsank'á k'uanachakohonuu. ⁵ Ndaha tsa najmi an kikjin tíjñajinnuu, tunga kjintahána jun kō tsjo mana nga be xi nkú ts'in nda tintsubakoo xinkiu

ko xi nkú ts'ín ndjá tinchajiun Cristo, at'aha kui xi s'ejinnuu.

B'i ts'ín tsakúya Pablo xi nkú ts'ín tintsubaqaá Cristo

⁶ Kui b'a maha, xi nkú ts'ín kin'ekjáihin ruu Nda Ntíaná Jesucristo, tu nkú b'ahá ts'ín tsjénkiu.

⁷ Nanka katji kjamanuu ajihin Cristo ko ndjá tinchajiun, at'aha kui xi kis'ejinnuu xi nkú ts'ín kisakúyanuu. Ko tehente tjohon máb'achjihí Ntíaná nga ja kamo xuta xi ts'e.

⁸ Chuhun yonuu nga najmi tu ch'a xi k'uanachakohonuu én nanka tiya xi be xuta. Kui xi nibáha ra sin chá xi be xuta, ni xi asunnte y'aha ra. Najmi Cristo nibáha ra.

⁹ Ajin yjonintehe Jesucristo tijnajin kikjin Ntíaná, ¹⁰ ko jun ja kisakúnuu ni xi ndyjat'anuu kai at'aha nkuhú tsichu makoo Cristo. Kui xi batéxumaha ngayjee xi tjihin xá ko xi batéxuma.

¹¹ Nk'ie nga kis'ejinnuu Cristo, kin'enuu nku circuncision, tunga najmi circuncision xi n'ehé ra yjonintee kin'enuu. Circuncision xi kjexín ní jé xi kich'o kin'enuu. Cristo xi b'a kits'innuu. ¹² Nk'ie nga kisatentó, tsangiyanjikoo Cristo. Nk'ie nga kis'ejinnuu nga'yuhun Ntíaná xi kits'ínkj'áiyako ngáha ra Cristo ngabayoo, ta j'áiyakoo ko kui ajihin ngabayoo.

¹³ Jun xuta k'ien kamo nistjin nk'ie tu ngat'aha ngatitsunnuu, nk'ie nga najmi kin'enuu ni circuncision xu'bo. Tunga Ntíaná kits'ínk'iéntu tik'unkonuu Cristo. Kits'ínndyjat'aná ngayjee ngatitsunná. ¹⁴ Kikjetiya xujun xi má nga kis'et'a ni xi tjenná, xi ngji kontraná. Kikjexín xujun ko

kingját'a kruu. ¹⁵ Cristo kits'ínchjén Ntíaná nga kits'ín nganaḥa xi tjihin xá ko xi nk'a tjen. Kiya kjuasuba xi kisakúhu nga kin'e nganaḥa xi tjihin xá ko xi nk'a tjen.

¹⁶ Kui nga najmi tu ch'a n'esihin ruu xi kuinchjayanenuu ngat'aha ni xi tíchino ko tsa xi tí'yu, ko a ra ngat'aha nistjin nga tíbitju s'í, ko a ra nistjin nga tíb'atuts'ihin sóo, ko tsa nistjin nkjún. ¹⁷ Ngayjee ni xu'bi mjehe kuakúchji ni xi nibá askahan, tunga Cristo bi b'éjña chji sisin ni xi nibóo.

¹⁸ Najmi tu 'bainto nga xi b'asje nimakjua maña yjoho ko benkjún ntítsjee incha k'uéchjanuu ni xi n'ekjohoon. Kui jóo xi ni xi ma chji suba kuihi nchjanímíyaha ko nk'a b'asje tiya yjoho ngat'aha ni xi mankjihin ei asuntee. ¹⁹ Ja incha ngji t'axihin xi nintaku xuta ninku maha. At'aha xi nintaku xuta ninku maha, kui xi ts'ín nga sá yjonintee xi nkú ts'ín mjehe Ntíaná nga sá. Sá yjonintee at'aha incha y'a y'ahá ra xinkjin.

B'i ts'ín tsakúya Pablo nk'ie nga Cristo tsayakaá ko j'áiyako ngáhaná

²⁰ Ja tsyakoo Cristo, kui nga kama ndáhi ruu ni xi batéxumaha asuntee. Kui nga, ¿á tintsuba saha ruu asuntee xi nkú ts'ín tjintuhu xuta xi ts'e? ¿Á tínu'yá'én saha ruu kjuatéxuma xi tsuhu xuta?

²¹ B'a tsu éen: “Najmi tu n'ekoo niu. Najmi tu chjut'o niu. Najmi tu chjubó niu.” ²² Kui ni xu'bi nintaku xuta tsitjuhu ko xuta y'éjña. Feya nii nga n'echjén. ²³ B'a maha xi kixi mankjihin maha nga b'a ts'ín nchja, at'aha ts'ín kjua'yúhun ra xuta nga skuenkjún Ntíaná ko nga ts'ín nimakjua yjoho ko

nga 'yún tsjáha kjuanima yjonintehē. Tunga najmi chumi ni chjīhi ra tsa basinkoná nga b'éch'oná ni xi nchjaha animaná asunntei.

3

¹ Ja j'áiyakoo Cristo ngabayoo, kui nga tinchísjaihinu ni xi tjín ndjiojmi ján má tíjnat'aha Cristo Ntíaná. ² Ni xi tjeheñ ra ndjiojmi ján n'enkjíntak'un, najmi ni xi ts'e asunntee. ³ At'aha ja tsayo ko tintsuba tík'unkoo Cristo nginkun Ntíaná. Kui nga najmi ma chjīhi yáha jun nd'ai. ⁴ Cristo xi ts'ín nga tintsuboo. Nístjin nga k'uaíkučhi yjoho Cristo, kui nístjiun ta cha yáha jun ko kuakúchjiu kjuachánkaha.

B'i ts'ín tsakúya Pablo xi nkú ts'ín chúhuún yjoná

⁵ Kui nga n'ek'iehennu ni xi tjíntujín animanu xi tjeheñ ra asunntee. Najmi tu ch'a xi chuba kjuántukohó xinkjín, ko tsa ts'ín ni xi chuntí nginkun Ntíaná, tsa yjonintee xi kuatéxumaha, tsa mjehe ts'ín ni xi ch'on tjín, tsa kjuanchiná 'yún kjuásihin. Xi 'yún fásihin kjuanchiná, kui xi k'ají ntia tjennki. ⁶ Tu ngat'aha nga b'a incha ts'ín xuta, kui kjuaha nga incha nibánehe ra kjuakjahan Ntíaná. ⁷ Ko jun b'a ta kin'o nístjin nk'ie, nk'ie nga tintsubajiun ni xu'bo.

⁸ Nd'ai ta n'e t'axíun kjuakjoon, kjuastintoo, kjua'unchoo, én chubatit'oon ko én ch'on tsuu. ⁹ Najmi tu ch'anachohó xinkju. Xi nkú ts'ín tintsuboo nístjin nk'ie, b'a joyaha tsa nku najyun chá kin'esjo. ¹⁰ Tunga xi nkú ts'ín tintsuboo nd'ai, b'a joyaha tsa najyun tsetse kindyja ngáhanu. Xi nkú ts'ín tjíyaha Ntíaná, b'a ts'ín tís'eyanuu nk'ie

nga títs'ín tsetsenuu kō nga tímankjin sisinnuu nkú tjihin rā ngat'a ts'e Ntíaná. ¹¹ Ajihin xuta xi ja kama tsetse najmi tā chumi ni behe yá xi ntje judio tjeheñ rā kō yá xi najmi ntje judio tjeheñ rā, yá xi kin'ehe ni circuncision kō yá xi najmi kin'ehe, yá xi xin nibáha kō yá xi kinte tjeñ nginkun xuta, yá xi xuta musu xi kich'atse kō yá xi ndáihí yjoho. Ngayjee kui niñ nkuhú bichú majín Cristo, kō Cristo tññajihin ngayjee.

¹² Ntíaná j'ájinnuu, kikj'áts'enuu kō tjoho jun. Kui nga n'e tsetse yahanu xi nkú ts'ín kuintsuboo nga chasenimoo xinkiu, kas'enuu kjuanda, nimañjua kas'eyanuu, nimañjua n'ekoo xinkiu kō najmi tu kitsa katuma stinnuu. ¹³ N'e'yún tak'uhun xinkiu kō n'endyat'ohoo xinkiu tsa tjin ajinnuu kjuasti. Xi nkú ts'ín kits'inndyat'anuu Nda Ntíaná, b'a tā ts'ín n'endyat'ohoo xinkiu. ¹⁴ N'etjō xinkiu, at'aha kjuatjoo xi 'yún chjí saha rā nga ngayjee ni xingisoo kō nkuhú ts'ín manuu.

¹⁵ Kichj'ajinnuu tu xi nkuhú yjonintehe Cristo kamahanu kō b'a ts'ín s'ehenuu kjuajyu. Kjuajyuhu Cristo katsjáníyáha animanuu kō tehente tjohon máb'achjíhi Ntíaná ngat'a ts'e kui niu. ¹⁶ Kat'ejñajinyjenuu éheñ Cristo. N'enkjín'un sisiun xi nkú ts'ín kuakúyohoo kō nga k'uai niyóhoo xinkiu. Tjohon máb'achjíhi Ntíaná ajin animanuu nga sóhoo salmo kō sohon ninku kō xi nkú ts'ín kuakúyanuu Espiritu nga só. ¹⁷ Ngatentee ni xi n'oo, tsa chūbo kō tsa tu mí xáha ni xi n'oo, Nda Ntíaná Jesu n'ekasíún títjun nga b'a n'oo kō tjohon máb'achjíhi Ntia Na'miná ngat'a ts'e ni xi kisakújinnuu Jesu.

B'í ts'ín tsakúya Pablo xi nkú ts'ín k'úéntu xuta

¹⁸ Jun xi tí'minuu chjuún, chankjún x'innuu. B'a n'oo xi nkú ts'ín tǐñaha xuta xi yjanki Nda Ntǐaná.

¹⁹ Jun xi tí'minuu x'in, n'etjǒ chjuúnnuu kǒ najmi tǔ ndjá n'ekoo.

²⁰ Jun xi tí'minuu ntí, tǐnú'yá'én tehentohoo xi chánuu. At'aha kui niu xi sasihin Nda Ntǐaná.

²¹ Jun xi tí'minuu na'mi, najmi tǔ chuba kjahán n'ekoo ntínuu, tǔ xi najmi kfehe ra k'un.

²² Jun xi tí'minuu xuta musu xi kich'atse, tǐnú'yá'én tehentohoo xi já ntǐanuu maha ei asunntej. Najmi tǔ nk'ie nga tǐbasenuu b'a n'o, tsa tǔ xi nda kuasehenuu. Ngayjehe ní tak'un b'a n'oo at'aha Nda Ntǐaná yankjún. ²³ Tǔ mí xáha ni xi n'oo, ngayjehe animanuu b'a noo. B'a n'oo xi nkúhu tsa Nda Ntǐaná tǐn'exát'ohoo, najmi tsa xuta.

²⁴ Yo nga sakúnuu ni xi tǐndaha Ntǐaná nga tsjáha ntíhi. Cristo tǐn'exát'ohoo, kui xi Nda Ntǐanuu. ²⁵ Xi tǐts'ín ni xi najmi b'a tǐn, kui xi ts'ǐnkjáin ngajoya ngáha ra chjǐhi ni xi tǐts'ín. Najmi ngabi ts'ínko Ntǐaná xuta.

4

¹ Kǒ jun xi tí'minuu já ntǐa, nda kǒ kixi n'ekoo xuta musu xi kich'atso. At'aha yo nga ta tǐñanuu kǒ jun nku Nda Ntǐa ndjǐojmi ján.

² N'ekjas'ohoon yjonuu nk'ie nga chubakoo Ntǐaná. Najmi tǔ n'ekjentohoo yjonuu nga tjohoon máb'achjǐhi ngat'a ts'e ni nda xi tsjánuu.

³ Kǒ ta chubantjaini tǔ xi Ntǐaná tsjánteni má nga k'úénijmí éhen, tǔ xi kuixínyahaní ni xi kis'ejña 'ma nǐstjin nk'ie kǒ tís'ejña chji nd'ai ngat'aha Cristo. At'aha kui kjuaha kjíya'yúhunna

ei. ⁴ Chubantjainú tu xi kama kuakuchjí sisihinna éhen kō xi nkú ts'ín tǐhin nga kuinchja.

⁵ Nanka n'ekjínk'un xi nkú ts'ín kuintsu**ba**jihuun xuta xi najmi s'ejihin Ntǐaná. Xki nǐstjin xi kju**a** chase sisihuun ni xi n'oo. ⁶ Tehente tsjo ts'ín chūbo kō kas'ehe sin ni xi chūbo. B'a ts'ín cháhanu xi nkú k'úihuun nga nkúnkú xuta.

B'í ts'ín kits'ínkje Pablo xujuin

⁷ Xi nkú ts'ín tǐjǐña ei ku**its**uyayjenuu nda Tik**ko**, nda nts'eé xi tjona, xi kixi tǐts'íntjusun xáha, xi ta tǐts'ínxát'aha Nda Ntǐaná xi nkúhu an. ⁸ Kui xi tǐts'ínkjísenuu tu xi cháhanu xi nkú n'e tintsu**ba**i ei kō tu xi sakú nga'yúhunu. ⁹ Kō tǐts'ínkjíka Onesim**o**, nda nts'eé xi tjona xi ta kixi tǐts'íntjusun xáha kō xi nda nankinu maha. Incha ku**its**uyanuu ngatenteē ni xi tíma ei.

¹⁰ Tǐts'ínkjinuu kjuasuniña Aristark**o**, nda xi kjiya'yúnkōna nubayá ei, kō Mark**o** xi nts'esti maha Bernab**e**. Ja ta tsichunu éhen Mark**o**. Nda n'ekjóh**o**on tsa kuichúsenuu y**o**. ¹¹ Kō tǐts'ínkjinuu kjuasuniña Jesu, kui nd**o** xi ta 'mi ya Just**o**. Tu kuihí já judi**o** xu'b**i** xi y'anjikōna xá xi tǐts'ian nga tǐb'enijm**í**a xi nkú ts'ín batéxuma Ntǐaná. Kui jó**o** xi tsjá nga'yúnna.

¹² Ta tǐts'ínkjinuu kjuasuniña Epafra, xi nda nankinu maha. Kui xi ta tǐts'ínxát'aha Crist**o** Jesu kō tehente ngayjehe k'un tǐbankintjáinu nga tǐnchjako Ntǐaná, tu xi ndjá ku**in**chahanu kō kama je kikjiun kō kamo xi nkú ts'ín mjehe Ntǐaná. ¹³ An be sisian xi nkú ts'ín Epafra kjintaha ra jun kō ta kjintaha ra xuta xi tǐn nanki Laodicea kō xi tǐn nanki Hierap**o**li.

¹⁴ Ta títs'ínkjinuu kjuasuniña Luca, nda chjinenki xi tjona, ko Dema.

¹⁵ Tjohoon kjuasuniñana já nts'eé xi tjín nanki Laodicea ko tjohoon kjuasuniñana tachjuún Ninfa ko xuta ninku xi ma ñjakú ni'yaha. ¹⁶ Nga ja kamanuu nga n'eyo xujuin, ta n'ekjihuu nga kats'inya xuta ninku Laodicea. Ko jun ta n'eyo xujun xi nibaha Laodicea.

¹⁷ B'a t'ihun Arkipo: “N'enkjíntak'uin nga nda n'etjusun xaha Nda Ntíaná xi kik'aihi.”

¹⁸ An Pablo ntuna tib'et'ahanuu kjuasuniñana. N'ekj'áitsjon nga kjíiya'yán.

Kas'enuu kjuandaha Ntíaná.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

e05183c2-7c34-5cdd-8c78-15ea51bd8cbb